

A series of several thin, parallel white lines that originate from the bottom left and extend diagonally towards the top right corner of the cover.

Galgale

ŞÎÎRÎ

AZAD ARARAT

DE VAJE HEFTANÎN VAJE

De vaje Heftanîn vaje
Heft tanîn warê cengan
Çend û çend hevalê virarê to de
Ê esmeran ra çi xeber

Esmera cengê sûrî de
Çend dirbetinî ha ceng de
Sênayê miyanê gonî de
Bişirîyayîşanê lewan ra çi xeber

Ê lajî hîna bişirîyenê
Ê kênayê porxelekî
Pêrodayîşêk senîn de
Pezkûvî, teyr û tur ra çi xeber

Asmêno pako kewe
Hewrê sîyayanê tarî
Çend û çend qamdergî şî ser
Sereştişan ra çi xeber

Meterîsî rijîyayî
Mîyanê huyayîşan de
Estareya dosere asmên de
Ê wextanê têkewtişan de

Pêtîya gerîlayanê xij
Çêrî nika ha çi lej de
Serkewtişo ho aso de
A roja mijdanî de

Qamişlo / 27.07.2020, saet: 03:40

XASEKÎYA TO

Xasekîya to, ax xasekîya to
Ezo mest bena seba sewdaya to
To ra nêvêrena, ez heyranê to
Bê to nêbeno û ez fedayê to

Derd girana mi, ax derd girana mi
Bêwayîr û bêkes, bê verara mi
Bê ronîşe kîşte de, sewdaya mi
To tena nêverdana, ez seba to

Estare! ax estareya asmênî
Kewenê to dima tolaz û dişmenî
Nêyarî wazenê ke to biremnî
Ezo seveknayox, pawitoxê to

Newalê to, ax newalê to, kêne
Bîyê ca û warê cîf girewtenê
Kêna, lajî pîya kayî kay kenê
Heme newa, deyîrî dîyarî to

Çem û layê şitinî, ax şitinî
Benê bindest û mehkûmê dişmenî
Haho! na dinya çiqas bîya fanî?
Gerîla! ameyox û hêvîya to

Vewre mîyan de, ax vewre mîyan de
Lingî cemedyenê têkewtişî de
Vewre bena sûr, rojêka bêbext de
Tim ancena, êş û azaranê to

Teknîk o, ax teknîk o
Oyo ke beno, şerê peyênî yo
Keweno ser, o şarê tarîxî yo
Lejwano, reynayox û piştîya to
Bindestîye zor a, ax bindestîye
To senî bireyna na koletîye
Ti zî zana çi weş a azadîye
Ha ezo ca ana, omidanê to
Êdî nelorîne, êdî neke ax
Dişmeno remeno, to ver keno wax
Ha yo tersî ra lerzeno û vano heywax
Rojî roşan, heta felatîya to

Kobanî / 08.03.19, saet: 09:10

SAYÊ SÛRÎ

Sayê kurdî yê sûrî
Kewtê cengî bi dore
Resenê azadîye
Ha ewro ha meşte

*Şingal

SEMA DE GEŞ BI RENGÊ ADIRÎ

Ya Sema, Koçera sînaya!
To rê secde kena ez
Çêra koyanê xoverdayoxan
Torina Biroyê Heskê Telî yo Kurdîstanî

Ereqê çareyê to de xo şuwena
Adirê kalaşnîkofê to de vêşena
Lew nana engîştâ tetikkêşe
Heybet û heşmetê to de çin bena

Gilanê to mûnena yew bi yew
Lew nana bişirîyayîşê to ra
Awiranê to ra verrojikî abenê
Çinayê gabardînî weş şinê to ra

Sema! keskûsûra semayan
Adirê Araratî
Tede vêşnayî dişmen û bêbextî
Weş kerd wisarê şarî

Ey şopdara merdimê kamilî!
Mi to de dî heme xemilî
Weş gêrnena govenda cengî
No hêz to xo de senî dî?

Vengo nermek sey birîsimî
Winî erjnena pergala cîhanî
Bena çareyê azaranê şarî
Cewherêko zernên mi to de dî

Winî bi aqil û tevger
Winî xîretkar û çalakger
Ke winî erzena ser
Ancena ruhê dişmenî

To asmên paka kerd
Hevalan rê rayîr akerd
Rengê cengî dîyar kerd
Bi to ya ser kewenê hevalî

Hemraya Hilmî Yildirimî
Fedayîyê Kurdîstanî
Bi to ya şa benê
Heme çêranê verênî

Qamişlo / 03.04.2020, saet: 00:00

DEYÎRÊKA SOSYALÎSTKÎ

Bê to rê deyîrêka sosyalîstkî vajî
Hetêkê xo bi vengê çêranê seypê ra
Hetêkê xo bi vengê parekerdişî ra
Ser sêneyê welato orta cenetî de

Bê to rê deyîrêka sosyalîstkî vajî
Qîrayişê gerîlayanê koberzan ra
Xuşe-xuşa royê Dîjle û Feratî ra
Binê dara mazêreyêka kokime de

Bê to rê deyîrêka sosyalîstkî vajî
Vayê Andokî û porê şanekerde ra
Axpînêk de gurguzîya babîyê xo ra
Yew rasteyêkê govenda gerîlayan de

Bê to rê deyîrêka sosyalîstkî vajî
Axîn û nalînanê mayanê kurdî ra
Laş letebîyaye yê çêrêkî koyij ra
Gelîyê Basreta Gabara îsyankar de

Bê to rê deyîrêka sosyalîstkî vajî
Vîyarte, ewro û ameyoxo zernên ra
Roştîyê aşme û lêlê şewdirêkî ra
Tîtikê îsyankaranê verênan ser de

Bê to rê deyîrêka sosyalîstkî vajî
Şîretanê Apo û seyîd û şêxan ra
Çêranê Egîd, Elîşer û Yadoyî ra
Meydananê dardekerdeyanê sûkan de

Bê to rê deyîrêka sosyalîstkî vajî
Vengê kênanan û lajekanê Rojî ra
Vengê roştîwazê çinagarbardînan ra
Yewna meterîsêko pêrodayîşî de

Bê to rê deyîrêka sosyalîstkî vajî
Bes o qaxûkerdiş û mixul werdişî ra
Bes o qirkerdiş û dejanê pêpeynî ra
Ciwîyayîş heq o Kurdîstano xoser de

Qamişlo / 15.03.2020, saet 00:56

CUYE SENÎN A?

Cuye senîn a?
Weşîye senîn?
Goşê xo mi ser ne wareza!
Dişmen bombe varneno
Ge-gane tank, obus, fuze
Erzeno bê ser û ber
Şewêka mijine de

Cuye senîn a?
Weşîye senîn?
Goşê xo mi ser ne wareza!
Komêka gerîla
Ha talde de
Bi dîqet, bi baldarîye
Erzena cergan ser
Şerêko yeman de
Tayê benê çêrî, tayê zî dirbetin
Şewêka pûkine de

Cuye senîn a?
Weşîye senîn?
Goşê xo mi ser ne wareza!
Vîst û çarê çele, di hezar û vîst de
Ke Xarpêt de erd lerza
Xoxe bî zehîrine
Bî nameyê mergî
Yew şewa pûkine de
Şêligan kerdêne hewar
Hewar haho hewar!
Asmên de gulbang dayêne
Hewar hewara kirdane
Binê bananê rijîyayan de
Çekuyê kirdkî berz bîyêne
Berz bîyêne ax û eman

Cuye senîn a?
Weşîye senîn?
Goşê xo mi ser ne wareza!
Dest bidê yewbînî dest
Kurdî pêro pîya yew dest
Nêke dişmen o, mîyane ra şikneno desinde
Ziwanî çin keno
Ser ra zî tinazî

Cuye senîn a?
Weşîye senîn?
Goşê xo mi ser ne wareza!
Êş, azar, jan o
Zerrîya ma tewena
Kurd o, Kurdîstan o
Qaxû nêkeno tu kes
Doş bidê doş
Piştî piştî ra bibestê
Reyayîş ma dest de yo
Nêke şima vînenê
Torê komelkî, şaşeyê televîzyonî de
Faşîstê fekgonîyinî
Senî bîyê har, senî kişenê merdimîye, senî?
Senî kewenê pey rantî?
Trajedîya ma ra senî weye benê, senî?

Cuye senîn a?
Weşîye senîn?
Goşê xo mi ser ne wareza!
Çerxê felekî ho gêreno
Sîyaset, dîplomasî; dayîş, girewtîş
Peyê perdeyan de pêameyîş
Ma rê beno barût, adir
Vareno ha vareno
Sifre ronanê nemerdî
Wenê ha wenê
Qet mird zî nêbenê
Sêneyê cinîkan ser de
Kenê kêfweşî û şadî
Badê yew tîyatro ronanê
Bi ma kenê henek û tinazî
Û vanê: “Ma yê way û birayî”

Cuye senîn a?
Weşîye senîn?
Goşê xo mi ser ne wareza!
Çend qiseyê mi estê
Seba hemkar û xayînan
Ê yê dişmen ra dişmenêr
Tayê ci bi nermî danê ma ro
Tayê ci bi pêtî
Tayê zî estê
Qet meperse lo
Winî har, winî xora şîyaye
Ti vanî qey
Ê yê welatperwer, winî şorişgêr
Ti vanî qey
Meşte yan bîro ha ronane Kurdîstanî

Winî fek erzenê
Winî bi hêrs, winî bi kîn, kîndar
Dewlet pût, nîjatperestî slogan, ala sembol
Labelê, yew roje şer nêkenê
Yew çalakî nêvirazenê
Dişmen qet nêtepişeno
Rojêk nêerzeno zîndanî
Tirê, rastîye çik a, senîn a?
Tayê ci sifreyê dişmenî ra wenê
Dest nanê pîze ser
Vilênenê ha vilênenê
Tayê ci nezan
Heta vajî korfehm
Xulasa, yenê bikarardene

Cuye senîn a?
Weşîye senîn?
Goşê xo mi ser ne wareza!
Cuye şewe ya, hem zî roje
Beyntare de şan û şewdir
Binê vewre germ o
Ser de kutik zî nêciwîyeno
Hetê xo baş weçîne
Timûtim başîye reyde be
Başan ra başêr be
Kam zaneno meşte çi beno ke!
Qamişlo / 25.01.2020

SERRA NEWÎYE

Xêr ameya serra newîye
Ma rê bîyare yew hêvîye
Wexto ke binê serre bîye
Şewdirê ma bike roştîye

Diwês menga de timî şadî
Her hewteyê ma sey Gaxandî
Her roje ravêro bê derdî
Xêr ameya serra newîye

Layan de xuşxuşa awe bo
Tap û tuman de kenger bol bo
Qijik û luye her ca de bo
Bi aheng û rengin bo cuye

Verê verkan şar ma pîroz kerd
Dinya de urf edet vila kerd
Her ca de perestgeh awan kerd
Mirad ca kena serra newîye

Kobanî / 31.12.2019

PERSÎYENO

Cengawerî danê piro, bi merdî
Tayê ma fetelînê bi nemerdî
Bîyê kutikê beran, dinya nêdî
Wextêk yeno, hesap zî persîyeno

Cengawerî danê piro, bi merdî
Bazarî kenê, tolaz û efendî
Wazenê biroşê, dawaya kurdî
Rojêk yeno, hesap zî persîyeno

Cengawerî danê piro, bi merdî
Neyar û dişmenî, kenê fesadî
Yew dosto zerrî ra pak, qet ma nêdî
Dewrêk yeno, hesap zî persîyeno

Cengawerî danê piro, bi merdî
Şaro feqîr, qet rojêka weş nêdî
Pepûg zî ma rê nêwaneno êdî
Wisar yeno, hesap zî persîyeno

Cengawerî danê piro, bi merdî
Dewletî zerrîya ma kardî kerdî
Bîyê verg misilmanê mucahîdî
Êdî wext o, hesap zî persîyeno

Cengawerî danê piro, bi merdî
Vurnenê dinyayî anê azadî
Gîrîyeno heyfê şêx û seyîdî
Ha yo wext o, hesap zî persîyeno

Kobanî / 03.10.2019

GALGALE

Badê şorişî dest pêkerd galgale
Çemberkî û bi rêze bî galgale
Komelnasî bî babetê galgale
Do bêro azadîya rastikine

Sereyê her yewî de yewna fikir
Kewtî pêrodayîşî heme hizir
Mîyan de zî tay zanayê bê zikir
Musenê azadîya rastikine

Kobanî de ke xoşebere beno
Winî mezgan de rayîr roştî beno
Bê têkoşînî serkewtiş nêbeno
Ha anê azadîya rastikine

Zanayanê komelî pêr û pîya
Kokim û ciwanî yê pêr û pîya
Cinîyanê bi fam ê pêr û pîya
Mojnenê azadîya rastikine

Cinîyî ver de kenê raybertîye
Ciwani danê pey bi keyfweşîye
Kokimî ewnenê bi pêşaşîye
Deresa azadîya rastikine
Kobanî / 16 êlûle 2019

15ê TEBAXE

Koyî ameyî zîwan
Teq û reqîya çekan
Kalî werîştî payan
Bî veyveyê bindestan

Tîtikan de adir bî
Zerrîyan de hêvî bî
Çalakîker Egîd bî
Kîşte de erdalî bî

Xort û kênayî pîya
Roja kerametî ya
Bi alaya sûre ya
Roje bî roja maya

Xo de merdiş mirêna
Ke alaye hewa na
Şar bindestan ra reyna
Gerîla dişmen tersna

Na dawa cîya bîye
Newe kerdêne cuye
Perrnayêne helîye
Ardêne azadîye

Kobanî / 15.08.2019

MENSÛRE KURDÎSTANÎ

Çîçero kam o
Gothe çi kes o
Yê ma ya
Mensûre Kurdîstanî

Ke nuşto vîst hezarî
Keybanûya şîrî
Safî Kurdîstanî
La menda bêwayîrî

Kobanî / 14.03.2019, saet 07:55

GULE

Zerrîya xo bar kena
Ware de ronana
To rê deyiîrî kena
Dima serbestî ana

Estareyî asmên de
Gulsosine zerrî de
Serkewtişo aso de
Ezo têkoşînî de

Mi girewta guldeste
Zerrî ra to ra beste
Û ha ewro ha meşte
Gule bena serdeste

Kobanî / 14.03.2019, saet 07:15

BIGÊR ZERRÎYA MI

Bigêr zerrîya mi tim bigêr
Rojê ti zî vindena bixêr
Ke kaşan ra ti zî bîya lêr
Vindena yew çale de bixêr

Kobanî / 25.02.2019

ASMÊNÎ AZAD KERO

Ver bi cor û bi kelecane şî
Bi baldarî û kelecane şî
Bomba teqna ra tepîya şî
Ke Kurdîstanî awan kero

Şewe û roje zehmetî de
O vêşan bi Kurdîstanî de
Xover ro dano welatî de
Ke Kurdîstanî azad kero

Cinî û camêrdan pîya yo
Bi çeke û rextî reyde yo
Bi kîn û bi hêrs û pola yo
Do Kurdîstanî xoser kero

Lejwan o, lejan ra hes keno
Seba aşîfîye cehd keno
Xoverdayîşî ra hes keno
Do azadîye qetî kero

Gêreno û nêedizyeno
Sere û bejne nizm nêkeno
Dişmenî rê lava nêkeno
Do seyyewbînî awan kero

Ez qala gerîlayêk kena
Lajê xoverdayoxî kena
Estare û asmênî kena
Erd û asmênî azad kero
Kobanî / 23 Sibate 2019

ARDÊNE

Çargamkî, winî zî lezkanî
Sînayoxî û eşqî reyde
Bi per a şîyêne, ver bi Rojî
Ardêne tanî, kerdêne zerrî

Komelan rê, bîyêne stare
Zerrî ronayêne ware
Canbexşê şarî yê
Ardêne weşîye, bi di perrî

Bejne ra barîk, xasek û tîtal
Linge de, weş bereqîna xirxal
Pêro kêna û xortê sey mertal
Ardêne şarî rê, qedirdarî

Kobanî / 25.04.2019

MERDIŞ

Gandarî mirenê peynî de
Çi kes nêmaneno na cuye de

Sûtal û tolaz zî mireno
Dîktator û faşîst zî çin beno

Merdişî de dadperwerî esto
Her kesî rê seyyewbînî esto

Zengînî zî ginenê çale ro
Feqîrî zî ginenê çale ro

No zelemele, haybure çik o?
Yewbînî çin û qirkerdiş çik o?

Ke peynî de zî esto merdiş
Na dinya ra esto xatirwaştîş
Sosine zî bar kena û şîna
Beybûne xo de pulisîyena
Hêrbîyayîş, têkewtiş çirê yo?
Cuye erd ra kaşkerdiş çirê yo?
Çirê kîmyasal reyde veşnayîş?
Keyeyê yewbînî xeripnayîş?
Peynî de zî yeno o Gangêr
Peyê cû cuye bena veracêr

Kobanî / 31.03.2019

HÊRS BE

Hêrs be zerrîya mi hêrs be
Qasê ke biperra hêrs be
Qasê ke birijna hêrs be
Hêrso şorişgêr û awankerdox

Kobanî / 02.03.2019

PISÎNGA MI

Pisînga mi pisînga mi

Hem gêrena hem kay kena

Pisînga mi pisînga mi

Pisînga mi rengin a

Pisînga mi pisînga mi

Pisînga mi mast hes kena

Hem wena hem rokena

Pisînga mi pisînga mi
Pisînga mi merre gêna
Hem gêna hem pê kay kena
Pisînga mi pisînga mi
Pê kay kena dima nimnena
Pisînga mi pisînga mi
Pisînga mi maran gêna

Ma maran ra pawena
Pisînga mi pisînga mi
Wawik ame kewt kulinde
Pisînga mi pisînga mi
Pisîng ama ez kerda aya
Pisînga mi pisînga mi
Ma pîya şî wawik qewirna

Pisînga mi pisînga mi
Pisînga mi hêşedar a
Pisînga mi pisînga mi
Bêrîn xo rê bivînê
Pisînga mi çi xasek a
Pisînga mi pisînga mi

*Seba warza û birarzayê ke mi qet nêdîyê.
Gelîya Lolan de, kîşt laya Lolan de nusîyaya.
Xinêre (Akademîya Wêje) / 13.10.2015

BÊ

Bê

Xo verde

Mîyanê zerrîya mi

Ti dejanê koyan vîna

Dejanê bêziwan

Dejanê matmende

XOVERDAYÎŞ

Welatî de suyeyan ra şîyêne
Pûk û pûkelek winî ameyêne
Va û varit bi qet nêvindertêne
Ling û destî bin ra qerisyayêne
Bîyêne kewe winî jan dayêne
Zimbêlî ca de cemed girewtêne
Ciwîyayîş zaf zehmet ameyêne
Merdiş asan bi lê qet nêbîyêne
Ê rojanê Botankî vîyartêne

Zerya gerîla girp-girp girpayêne
Kalaşnîkof ra adir varnayêne
Hêvî erd ra heta asmên şîyêne
Tarîx de sere wedarîyayêne
Mezlûmî ra nat zî xo ver dayêne
No tewir destana koyan nuştêne
Kerre û koyan de pêro dayêne
Şaristanan de zî xo nawnayêne
Welatî de wina ciwîyayêne

Qamişlo / 29.03.2020

OCALAN Î

To deyîra zîwanî ser î
Zerrî ser de gulsosin î
Tarîx û rastîya ma yî
Ocalan î, her Rêberî ma yî

01.02.2021

AX EMBAZO QETEKONIJ

Ax embazo Qetekonij
Fotografê vewre pare kenî
Ser de zî şîre
Çirê zerrîya mi dejnenî?
Qey nêweşîya mi nêzanî!
Vîrameyîşanê mi
Û hesretê mi nêzanî?
Mi vîrîya xezabê vewre kerdo
Vîrîya pûkî, serdo yemanî
Sûrela va û varit
Nêzana çirê la
Mi vîrîya xezeba vewre kerdo
Ne tena weşî û weşhalî
Mevaj ma beno, erê beno
Ez ê cayan, rind-xirab hes kena

Ax Qetekonij, embazo tîtal
Mi vîrîya koberzan kerdo
Wazena nê cayan ra şîrî
Heta ke biresî cayêko vewrin, koyin
Mesela: Çêrmûge, Şankûş û Aldûş
Dejêko pîl wenişto zerrîya mi ser
Ge-ge vana ax û ax
De Kurdîstano: heyran, qurban
Boka ma to rew bireynî
Binê potînanê kolonyalîstan ra
Ke ez biresî
Qeçekîya xo, vîrardeyanê xo
De Kurdîstano, mi rê berey o êdî

*Qeteko: Dewêka Şankûş a.

Qamişlo / 05.02.2020

ŞIVERÊ

Şiverê ser o, lingî têpey eştêne

Asmên ra varit, laşî ra ereq eştenê

A şewe do senî bivîyartêne, kesî nêzanitêne

Kesî mergî ra tersayêne, înan tey yarî kerdêne

Binkewtişî ra tersayêne, servistişî ser o fikirîyayêne

Hîsî tēmîyankewte la winî zî şîyêne

Dişmenî waştêne weş kero, seba xo ciwîyayîş
Şarî ser o bindestîye ferz kerdêne, bi nalayîş û jîvayîş
Sifre ronayêne, ser de ereq û gonîya bindestîye
Rîtûel û şahîyê xo, mezelan ser o ronayêne
Zîndanî viraştêne têpey, kerdêne deyîrî
Tede tada û êşkenceyê ke bîyêne, tertileyî ardêne vîrî
Rayber girawe de tepîşte, viraştêne îzole û kîndarî
Sole şanayêne kokê ma, wedaritêne tarîx û vîrê ma

Şiverê ser o, weş bi galgale
Lewan ser de heyfgirewtiş bi babete
Kênayêka porsîyaye, nameyê ci Êlule
Weştinaz a kome de û dest naya ser tetîke
Ke nêşewe de restî hedefî, awirî sey tîrî
Meterîsê duştî de, çete-korucu-leşkerî
Ke rast kerdî pêro çekî, perrayî di êrîşkerî
Erd ra rast kerdî, çewres û çar dagirkerî
Ke wedaritî, kel û melê lejkerî
Kulo sîya dekerdî, zerrîya paytextî
Çekî ke hewa nayî, eştêne ser piştî
Porsîyaya tinazîker, wina mojna lejkerî

Şiverê ser o, peyser ameyêne
Êrîşkero dirbetin, fekverkî piştî ser o bî
Varit ke ginayêne piro, boy dayêne gonî
Suye-tap-tûman ra, restî binê mazîrêre
Porsîyaye ke vat: “De embazênê! Adir wekerê
Çaydane ser nê, êdî kaxu mekerê
Kolonyalîstî pêro, ke komkiştene bikerê
Mîye û saqe pêt kerê, desinde difingan bigîrê.”

Pêrodayîş kar o, eke estê zordestî

Servistiş encam o, eke est bo yewîtî

Biramê hêga û rezan, cuye beno sey cenetî

War warê ma yo, teberkerê xerîbî, mekerê qindatî

Qamişlo / 06.02.2021